

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

12

T 8205/3142.82

江都縣志卷之十五

試江南揚州府江都縣知縣臣陸朝瑛奉

旨編輯

人物志二

忠節二十二人附二十一人

漢蔣子文廣陵人漢末為秣陵尉逐盜至鍾山為盜擊

傷其額死後吳主追封為都中侯立廟祀之明南嶽志

梁來疑字德山廣陵人幼有奇節侯景陷臺城廣陵太

守祖皓在城中將見殺疑乃說皓起兵討逆皓曰侯所

願也死且甘心為要勇士敢先等百餘人襲殺景黨董

江都縣志卷之十五

明佛大學漢和
圖書館珍藏印

試江南揚州府江都縣知縣臣陸朝璣奉

旨編輯

人物志二

忠節二十二人 附二十一人

漢蔣子文廣陵人漢末為秣陵尉逐盜至鍾山為盜擊傷其額死後吳主追封為都中侯立廟祀之

明南畿志

梁來嶷字德山廣陵人幼有奇節侯景陷臺城廣陵太守祖皓在城中將見殺嶷乃說皓起兵討逆皓曰僕所願也死且甘心為要勇士耿先等百餘人襲殺景黨董

紹先及皓敗焜并兄弟子姪遇害者十六人

梁書

隋來護兒字崇善江都人幼而卓詭好奇節初讀詩至擊鼓其鏜踴躍用兵羔裘豹飾孔武有力舍書嘆曰大丈夫當如是安能區區久事隴畝羣輩驚其言而壯其志賀若弼之鎮壽州也常令護兒爲間諜授大都督平陳之役護兒有功焉進位上開府從楊素擊高智慧於浙江賊據岸爲營周亘百餘里船艦蔽江素令護兒率數百輕艫徑登江岸直掩其營破之賊潰散護兒追至泉州智慧窮蹙遁走閩越進位大將軍除泉州刺史時盛道廷擁兵作亂護兒進擊破之又破汪文進於黠歙

進位柱國仁壽三年除瀛州刺史賜爵黃縣公邑三千戶尋加上柱國除右禦衛將軍大業六年從駕江都賜物千段令上千人塚宴父老州里榮之數歲轉右翊衛大將軍遼東之役護兒率樓船指滄海入自泚水去平壤六十里與高麗相遇進擊大破之乘勝直造城下破其郭郭明年又出滄海道師次東萊會楊元感作逆勒兵與宇文述等擊破之封榮國公邑二千戶十年又帥師渡海至卑奢城高麗舉國來戰大破之斬首千餘級將趨平壤高元震懼遣使上表請降尋有詔旋師轉左翊衛大將軍開府儀同三司江都之難宇文化及忌而

害之長子楷以父軍功授散騎郎朝散大夫楷弟弘仕至果毅郎將金紫光祿大夫弘弟整武賁郎將右光祿大夫化及反皆遇害唯少子恒濟獲免

隋書

隋書又曰整驍勇善撫士討擊羣盜所向皆捷賊甚憚之為作歌曰長白山頭百戰場十五五把長槍不畏官軍十萬眾只畏榮公第六郎

宋張琰廣陵人倜儻有節槩宋末補州牙兵隨制置李庭芝潰圍赴行在為追兵所及力戰死琰能詩皆忠憤

所發

明南畿志

吳駿發江都人少游鄉校常有投筆志李全擁眾攻揚

州郡守募良家子守禦駿發應募賊平補將校後以戰功累遷鎮江右軍統領元兵據盱眙賈似道遣兵攻之駿發為前鋒先登將一鼓而下會元援兵至駿發死之

明南畿志

明郭任江都人建文時為戶部侍郎靖難兵至被執不屈死裔孫允寧進士官御史

續藏書謂任丹徒人而萬曆府志載入江都因之

張恒江都人世襲揚州衛指揮使恒長身廣額負膽畧能拊士卒累官淮揚叅將致仕嘉靖丙辰倭由通泰犯揚州撫按卽家起之賊薄城而攻恒與千戶羅大爵百戶曾沂率兵禦之賊設伏教場後門以數人挑戰伏發

恒與大爵沂皆及於難後賊平以恒非見任官不以聞
萬曆間巡撫白其事始以恒從祀報功祠春秋與祭嘉
靖惟揚志

陳輔堯字九室江都人萬曆中舉於鄉令歸善考績以
天下第一清官擬授御史既而改牧膠州有餽山繭者
受而懸之公署陞永平府同知甫至任經略檄赴瀋陽
印馬 大兵至瀋陽從者諷之急去輔堯曰孰非封疆
臣奚去爲引佩刀自刎以死事聞贈按察使司僉事謚
忠烈建祠於江都西門高邦佐並祀稱雙忠本傳

高邦佐字以道襄陵人隨父業嵯於揚萬曆二十三年

成進士歷官薊州道終養歸天啓初起叅政分守廣寧
值熊廷弼王化貞構隙邦佐知事必敗乞歸方報允而
化貞棄廣寧走衆謂邦佐可入關邦佐叱曰吾一日未
去則一日封疆臣也將安之夜作書訣母策騎謁廷弼
請授兵赴難廷弼不納邦佐仰天長嘆泣語從者曰松
山吾守地當死此汝歸報太夫人遂解印綬自經僕高
永亦自經於側事聞贈太僕寺卿謚忠節本傳

王道隆字萱生江都人天啓甲子舉於鄉除壽州教諭
以端亮範士陞濱州知州治訟明允他邑咸質成焉壬
午冬流寇至濱陷道隆身被數創慷慨不屈死家屬十

餘口俱被難及櫬歸濱之士民哭送數十里外立祠表其忠

康熙府志

高孝鋹字仲達江都人尚書銓之曾孫天啓丁卯舉於鄉授豐縣教諭陞信陽知州時流賊橫熾楚豫間歲復大歉人相啖孝鋹竭橐糴穀以賑又晝夜設守備防不測監司王珵恣睢乖戾更置孝鋹所部署命弛備以撫賊孝鋹力爭不得未幾賊舉火登陴城潰孝鋹方率衆巷戰賊已踞州堂矣縛孝鋹逼降罵賊不屈死事聞贈河南布政司叅政蔭一子入監祀名宦鄉賢

康熙府志

郝景春字自古江都人萬曆壬子舉於鄉署鹽城教諭

罷歸起雜職歷知房縣時賊張獻忠等九營就撫鄖陽羅汝才屯房東白貴屯房北黑雲都屯房西景春以賊叵測獨請勦上官不聽一日汝才合三營逼房城景春擊之多斬馘上官數以朝命諭景春景春乃單騎入汝才營與結盟信既而獻忠叛穀城率衆圍房縣景春部署其子鳴鸞及僚吏分門守賊掘人墓取棺戴之首以攻城景春於城上然草并投石擊之賊掘城城上以燕油灌之賊立雲梯則設鈎鈎其梯斷之又設銃擊斃數百人凡五晝夜獻忠欲解去降賊指揮張三錫縋一賊上羣賊繼之城遂陷羅汝才以數十騎擁景春去景春

江都縣志 卷之五 五
待其子鳴鸞至相抱哭以手畫其頸曰此下不甚痛吾
父子決計死耳汝才從容勸景春降景春勃然曰天下
豈有降賊知縣乎於是與其子及僕陳宜見獻忠罵益
厲獻忠怒命牽景春父子并僕陳宜俱殺之贈太僕寺
少卿建祠江都以鳴鸞祔 郝太僕家傳

古道行江都人崇徵辛未武進士慷慨任俠行兵按司
馬法以叅將守駱馬湖庚辰寇至道行帥兵禦之戰累
勝援師不至竟歿於陣 康熙府志

梁于涘字飲光江都人崇徵癸未進士知萬安縣蒞任
甫一月 大兵下萬安于涘自投于纆家人救之不死

又投江爲邏者所獲囚之南昌獄幅巾布袍談笑賦一
詩自經死其詩云但知生富貴誰識死功名到頭成箇
是方見古人情時家奴梁善杜忠龔明張聰聰婦徐俱
從死 家傳

鄭爲虹字天玉江都人崇徵癸未進士除浦城令擢御
史巡仙霞關駐浦城時鄭芝龍盡撤守關將仙霞嶺二
百里間虛無一人 大兵入閩爲虹亟還浦城縱士民
出走自守空城爲我兵所執死之年二十有五僕陳龍
亦從死 本傳

韓鼎新字煥然江都人以明經授浙江某縣教諭城破

江都縣志 卷十五 公服縊堂上死

康熙府志

楊廷璧字荆璞江都人以貢生授舒城教諭賊張獻忠寇邑璧分守西門語縣令曰予職非守土今日之事義不可辭萬一不守張許吾師也鼓勵軍士嚴守三晝夜矢石皆盡城陷被執罵賊遇害子生員濟之亦殉父死

康熙府志

饒餘字吉人江都人性至孝父母歿家貧塋祭不能成禮每讀書至夜分則哭哭已復讀聞者爲之泣下乙酉城破自縊年三十六先餘聞李自成陷京師慷慨激烈憤不欲生至是竟死

康熙府志

韓默字文適先世臨汾人家揚州補江都縣學諸生揚州城破時默急歸謂妻蕭氏曰吾讀聖人書當守義死不可苟活若自爲計乃易儒巾服襴衫皂絛鞞旣肅遂墜井死長子彥超亦墜井死蕭與女皆自縊另有傳越一年居人有浚井者出默尸面目如生衣冠整潔惟左手損一小指左足脫一鞞而已家人伏尸哭左鼻忽出血人皆驚異乃棺殮以葬焉

王巖異香集

集又云默善法書尤工臨摹督帥史可法駐兵揚州謹重國書求法書最善者乃延默至軍門以賓禮見默援筆點畫盡二王可法欲官之辭去

高孝纘字申伯江都諸生城破書衣衿曰首陽志睢陽氣不二其心古今一致入學宮自經先聖座前本傳

王士琇揚州諸生設莊烈帝位泣拜與其弟同縊本傳

按傳記及舊志同時殉難者廿一人無姓氏可考者不勝其數

邵伯諸生張映發投井死 汪應坤自縊子銓觸石死

諸生劉慶遠投江死 指揮高一麟自刎死 諸生

金颺衣青衿同妻某氏對縊死越八日面如生 諸生

王廷珮同弟廷璉廷瑜飲酒從容談笑題壁作大書縊

死 諸生呂家齊投新橋河死 王纘字伯綿績字亞

綿續字叔綿兄弟三人並縊死 醫者陳天拔畫士陸

愉武生戴之藩義兵張有德市民馮應昌舟子徐某皆自盡又有生員汪自盤同妻蔡氏投井死

國朝董潏字禹門江都人恩貢順治三年隨征福建以功

授沙縣知縣時閩疆新定潏善撫字百姓安之四年有

山賊羅某與妖僧米逢年共為亂羅賊來寇沙潏屢出

戰屢敗之賊環攻三閱月不退潏守益堅一日賊攻東

門潏并力禦東門而逢年誘縣丞黎某開西門納賊潏

急令其子亦舒婿張思治率家丁五十三人與賊巷戰

並死焉潏被執罵賊甚厲賊怒叢射之仍割其頭去妻

葉氏抱一歲孫龔匿民舍以免事聞

朝贈潯福建按察司僉事賜祭墓在甘泉山孫長廕知縣歷馬湖府知府

論曰為臣而必捐軀殉義豈為臣之幸哉國事阨危心力俱竭君恩未報誓死殞身常山睢陽千古為烈矣更有身無民社之寄慷慨赴難義不偷生何其壯也顧必平日有讀書養氣之功而後臨難無傍徨瞻顧之態則夫勁松堅栢雖與百卉共生於和風甘露之下而早信其有冰霜不改之操讀忠節傳者當知所樹立矣

孝友二十七人 附六十人

漢吳奉廣陵人性至孝廣陵守張載舉為孝廉 明南畿志

晉盛彥字翁子廣陵人少有異才母王氏因疾失明彥不應辟召躬自侍養母食必自哺之母既病久婢使數見箠撻婢忿恨伺彥暫出取蟻螬炙飼之母食以為美然疑其異密藏以示彥彥見之抱母慟哭絕而後蘇母目豁然復明彥仕吳至中書侍郎吳平本邑大中正劉頌舉彥為小中正太康中卒 晉書

高悝江都人少孤事母以孝聞年十三值歲饑悝蔬食不厭每致甘肥於母撫幼弟友愛寓居江州刺史華軼辟為西曹書佐及軼敗悝為匿其妻子會赦乃出元帝

以爲叅軍歷位至丹陽尹光祿大夫封建昌伯

晉書

宋翟驥字士龍廣陵人以孝友稱南唐時策名江左太祖平吳之明年始歸宋驥急於養親授官雷夏簿考滿改彭城尉後復舉至道進士科以先人廬墓在廣陵固乞拜掃遷本州從事時人榮之王禹偁有送驥歸廣陵序云君子謂不由進士第者爲終身之恥富貴而不歸者有夜行之刺祿不及親者立不仕之戒此三者翟士龍之謂乎

萬曆縣志

元李茂大名人徙家揚州父興壽臨卒語茂曰吾病且死爾善事母茂泣受命奉母孟氏益謹母嘗病目失明

茂禱於泰安山三年復明又願母壽每夕祝天乞損已年益母孟氏竟年八十四歿居喪哀慟聞者傷之大德九年揚州火燒千餘家及茂廬而滅事聞旌之

元史

張緝字士明益都膠州人性孝友能詩文至正七年與兄紳弟經同領鄉薦由澤州儒學正轉泰州幕職棄之養親居揚州十五年揚州亂緝母姬氏方卧病賊突入卧內舉槍欲刺姬緝以身蔽姬槍中緝脇三日而死

元史

按李茂張緝皆非土著應入僑寓因其至性誠篤故采入孝友傳從所重也

明邱俊字漢英江都人由進士累陞雲南按察僉事念

母老無他子弟侍養會捧表進京即上疏乞終養詔許之稱孝縉紳間

嘉靖惟揚志

王輅字商卿江都人成化二十年父英病篤輅年十四割股肉食之愈後又以母老疾不起復割股療之又愈自秘其事人無知者後二十年兄尙書軌偶與客言及之里人追論共舉於巡按御史行縣旌門

嘉靖惟揚志

嚴效字應之江都貢生性婉順事父母能色養有所規諷雖責逐無悔父母亦悟愛之如初嘉靖初奉詔旌表授遼東都司經歷

康熙府志

魏堯民字欽夫江都人家貧年四十始婚婚時值父病

未幾父歿就苦塊及葬廬於墓三年既歸婦猶處子也伯兄舜民爲山東驛丞病卒負官錢堯民徒跣二千餘里走控當道得寬其逋而貧不能昇喪土人憐之予地以葬堯民痛哭識其封而歸嘉靖間里人聞其行於官予巾服等諸生復其家

萬曆縣志

栢英江都人延安衛指揮使秉性孝友父卒哀毀幾絕廬墓三年感狐兔爲侶有司以聞旌表其閭

姓譜

徐恩江都西鄉人家貧業農兄弟數人俱析爨恩獨終養膝下父患瘍侍藥餌甚謹日夜吮其患處父死母病痰不飲食者月餘時暑月恩伏牀下身爲蚊嘍無完膚

每晨焚香籲天偶一老兵過其門暑著絮衣肘後懸竹筒貯藥懇一粒大僅如粟母服尋愈人疑老兵者仙也母竟以高壽終有司獎之稱徐孝子

萬曆府志

王焦江都人郡諸生七歲喪父哀毀如成人長奉母蘇極孝母病帶九月不解侍母榻二十餘年母壽百歲卒容毀骨立三年不葷酒有司請為鄉飲賓辭不赴御史

陳某旌其門

萬曆府志

王隲江都人性孝友朝夕侍養其親必致所嗜兄早逝撫其遺孤同已子又嘗出已資助人婚喪周人貧乏里中誦其孝義

萬曆府志

楊守業江都人事父母曲盡孝謹母歿哭躄踊絕者數四自是勺水粒粟不入口越旬而死有司旌其門

萬曆府志

趙宗普江都人性至孝母八十病篤宗普年已六十割股以進母遂愈其子天澤亦割股救母病孫啓新道立皆以孝友世其家乙酉城破婦葉氏阮氏卞氏相攜赴水死里人稱其一門孝義

康熙府志

桑履直字日隣江都人萬曆間貢生少孤事母篤孝母性嚴色微不豫則長跽終日候霽乃起後子捷事履直亦竭盡孝養晨興必請親所嗜即遠道難得務力致之友愛兄弟自居敝廬而以新築之舍子弟里人咸以為

履直有子

康熙府志

蕭維堅江都人生而朴誠性至孝父病痞堅侍湯藥數年未嘗安寢及母病亦竭力焉親逝弟妹俱幼堅撫養成立經營婚嫁之弟婦温氏早孀撫其遺孤俾得守節及維堅夫婦疾劇子廷瓚後先割股瓚妻病孫日曠亦割肝以救一門三代篤孝里中未有也日曠另有傳

康熙府志

按舊志明嘉靖以後孝子順孫已旌表無事實者共二十八人附列於後

施錫 蘇應芳 胡易 崔一鳳 華時叙 趙

聚奎 王自強 胡芳 李相 汪有誥 華時

中 蘇眉鍾 朱蕙 陳世雍 俞廷薦 張慶衍

史先知 程士珍 張元弼 趙天澤 甯華錦

倪嘉會 彭以助 張文式 李之瑀 曾夢帶 高

天蔭 丁庚

國朝方立禮字武城本歙人遷江都父伊側室魏氏子也

八歲魏卒繼母汪氏有二子曰立化立乾愛之惡立禮汪性嚴酷每怒輒與大杖立禮受杖惟謹一日提登傷立禮幾絕及蘇無變容年十八父卒汪益逞逐立禮立禮時時侯門外問母起居欲入不敢低首淚暗下汪疾

則憂懼不食日夜奔走戶外少安乃已妻洪氏孝謹如立禮日受鞭撻無違色不使立禮知後汪攜立化立乾家揚州乙酉汪及立乾俱死立禮哀毀骨立立化亦早歿子女婚嫁喪葬立禮皆已任焉明崇徵間用宦者王坤督鹺立禮伏闕上書言不便狀爲通政所格年六十五卒雍正六年題 准建坊旌表

金玉節江都廩生乙酉 大兵下揚州時親歿未及葬玉節穴室中地瘞之封未完城破一卒至疑所瘞者金也將斫棺玉節匍匐伏棺大呼以身翼之復跪守土穴八晝夜得免祀鄉賢子竒選彥選皆諸生亦孝友並祀

鄉賢

郝明龍字雲蒸江都諸生明末父景春殉難房縣明龍號慟走戎壘中扶喪歸葬又北走上其事得卹典及廕乃念父死事之慘羸衣蔬食絕意仕進至九十四歲終孫旭光拔貢生

蕭日曠江都人幼有至性母朱病篤日曠炷香告天自剖其肝始剖之不得再剖之乃得肝二片而脇下洞開露見五內天將曙日曠危坐燈下血滿衣裾手持其肝令婦俞氏和藥以進母猶戒婦勿洩母服之瘳日曠創甚殞焉年二十六時康熙七年六月四日也里人感其

孝立祠梅花嶺祀之

王賓字仔園江都人能文善書法康熙癸卯舉於鄉歲壬戌赴禮部試竣聞父訃血淚迸下客往弔不能發一語惟兩手據地目直視髭髮竦豎晝夜哀號水漿不入口者五日而卒

張中達字九達江都歲貢生幼孤事母最孝先意承志纖細必周母好潔每日爲母滌拭浴器生二子後卽不復入室冬夜曲臥母足後母或遣之泣曰母氣衰非兒不煖母病篤嘗糞以希其愈子庸德戊午副榜亦以孝友稱嘗哭父病日哭母日加昏再哭弟遂失明著有四

書尊註會解行世

蔣垣字次斗江都瓜洲人歲貢生順治二年大兵至瓜洲人皆避去垣方十一歲父母俱卧病屬族人携垣去垣呱呱親側日侍湯藥不離兵見而憐之全其家旣長讀書敦行以儒學擅名一時遊其門者多致通顯子承慶歲貢生

俞士瑄字宣玉江都人天長歲貢生年十二侍母病口承其唾母歿哀毀骨立及長父病籲天請代瀕危獲痊後父歿泣血三年身不入內口不茹葷寢苦枕塊皆按禮而實踐之奉生母色養逾至生母歿喪葬盡禮一如

其父與母焉生平孝敬誠篤里人信服之康熙四十三年題 准建坊旌表

高成琦字軼韓江都諸生父以罪流三原母抱病不能起成琦每歲徒步三千里省父歸又負米養母一日父潛歸江都復還流所成琦侍行途中無貲驢費輒負父以行足裂流血及歸未久父歿成琦晝夜哀號乃抱父木主投義濟橋下死

附孝行旌表者四人

車鳴和 方陳章 車映昌 仲儀

附割股救親者二十八人

林中馨 林中喬 高策 康熙甲辰科武進士 閻士彥 周之

藩 黃士誠 汪三才 管士俊 朱呈祉 吳士俊

金天錫 胡宗安 余鏹 梁崇 甯宗越 史

行義 程國柱 蘇汝爵 吳遂 年八歲 陳道 郝玉

三年九歲 蘇汝祿 蘇汝顯 黃琮 史鑽 江

晉 年十歲 藍鍾華 王詢

論曰不學而知不慮而能之事攻之今古何其艱

哉守身養志醇然曾閔之行尚矣家庭一節之美

發於天性亦足稱也若夫割股割肝不知全授歸

親之義毀體拂經何可為訓顧世有漠然於親之

疾病生死不關休戚於其心者其相去又復何如耶

篤行三十三人

五代吳元嗣江都人子孫壽皆百歲一門前後義聚不分守臣聞於朝賜義門置義順二臺旌之

明南畿志

元秦昭廣陵人少遊京師其友鄧載酒祖餞俄昇一小鬟至曰此主事某託買妾也幸君便航附達昭弗諾鄧作色曰縱君自得之不過二千五百緡何峻辭乃爾昭勉強從命至臨清天漸暄夜多蚊納之帳中同寢抵都下置舍館主婦處持書往見主事問曰足下與家眷來

耶曰無有主事意不悅隨以小車取歸踰三日謁謝曰足下長者也昨已作簡附便驛報鄧公使知足下果能不孤付託之意矣後昭之子孫咸至顯官

陶宗儀輟耕錄

陶宗儀云柳下惠顏叔子千古以為美事今秦之於此女子也相從數千里飲食起居無適而不同又非造次顛沛者之比可謂厚德君子矣

劉信甫揚州人郡富商曹氏奴曹瀕死以孤托之孤漸長其叔利孤財妄訴於府曰某貲產未嘗分析盡為姪所據郡守劉察其詐直之叔之子以父訟不勝慚憤毒父死而復訴於府曰弟挾怨殺吾父適達魯花赤馬馬

火者受署之初與守不相能竟欲置孤法并以中守引致百餘人皆抑使誣執孤殺叔守受賄之詞末鞠信甫信甫曰殺人者孤實不知守亦無受賄被榜無完膚終無兩詞初信甫先遣人密送孤至京師匿一貴人家至是乃厚以金帛賂達魯花赤孤得免信甫減死既而叩蹕稱冤達魯花赤以罪去守復官是訟費巨萬計孤欲算償信甫曰奴之富皆主翁之蔭也主有難奴幸脫之其職也寧望報力辭不受

陶宗儀輟耕錄

明郝理北京錦衣衛籍生十齡而孤家故貧既而貧益甚有從父梁賈揚州富巨萬理往依之正德末年中貴

擅權諸大賈逮詔獄梁亦在逮中諸大賈相顧愕眙謂往當論死矣理挺然請身代梁往既對簿申冤狀反覆數千言不少紕刑曹爲白其事竟得赦梁名并諸大賈賈因梁咸奉金願交驩理却之再進再却初理歸梁梁以凡兒子畜之至是始重理理遂移家於揚梁卒理嗣其業又十年其富十倍於梁焉理性好結納饋遺諸父執歲不虛遇貧乏之士尤時時周贍之子莘登嘉靖丁未進士仕至湖廣布政使叅議理以子貴封奉直大夫

萬曆縣志

陳東山字魯望江都人慷慨多大節其所親嘗寄千金

江都縣志 卷十五
逾十數年死東山召其子還之封識如故又嘗挾千金
賈穎上僕盜其半事覺株連數十家東山白官罪止其
僕衆得免累穎人德之 萬曆府志

閻金字體礪其先陝西人父琮爲合肥主簿罷官貧不
能歸因占籍江都金任俠好義嘉靖戊午倭躡江淮知
府石茂華發民守城民望見倭薄城率股栗時西北賈
客揚州者數百人金召其豪共登陴射殺其渠魁倭聞
陴間多塞上人語又疑其矢非邊外勁弓不能發遂宵
遁境保無虞金以是名聞江淮其孫士選士聰曾孫汝
梅皆魁鄉舉登進士 萬曆府志

史宗顯字及達江都人知書重義有山東元克孝者來
揚與宗顯善其妻亡子繼歿子婦抱夫木主自縊克孝
貧不能殮宗顯爲之棺殯擇地以窆令子孫世掃墓祀
之通州貢士楊孟堅亦善宗顯除興安判止一子次廣
陵猝亡孟堅慟絕不欲之官宗顯勉其行以一婢贈之
冀其生子孟堅竟卒於任所適宗顯遊崇川孟堅見夢
於其友孫孟揚曰明日史君來爲我謝之詰朝夢揚訪
得宗顯於客舍語以故驚異因爲歸其喪宗顯以明經
授兩浙運判遷福建理問卒年七十二 康熙府志
卞珰字汝用江都人世務農業治家有法五世同居士

民推舉嘉靖十三年有司覈實上之詔旌其門

嘉靖惟揚志

栗寬字朝用揚州衛人嘗暮歸道拾遺金守其人至還

之遺金者分半貽寬弗受餉以鷄黍亦却之里有死不

能棺者傾橐以助不給則質貸以供未嘗望報焉

康熙府志

史起敬字德聚江都國學生授建昌府經歷曾破流賊

活俘民有功當擢用卽乞歸弟起聘少孤比長析產起

敬推身所積者均分之每濟里人困乏咸號爲長者

萬曆府志

夏應芳字元成江都人父翠幼孤貧鬻蔬奉母甘旨未

嘗缺應芳中萬曆戊子鄉試性豪俠喜結客名聞於時

浙人沈氏以敝笥寄應芳家曰藏書十餘年不取沈死

應芳訪其子歸之封識宛然發之書所覆皆白金計五

百餘兩其子初不知方貧無食於是感激終身里有不

孝子李打虎性凶暴虐其母應芳使勇士縛之令其母

坐上坐扶之數十其人叩頭流血長跽母前請罪應芳

令坐母側與食飲勸勉遣去後遂爲孝子應芳會試屢

不第會明末黨事熾遂絕意仕進卒於家孫九叙中康

熙丁巳科鄉試

王巖異香集

汪文德字是修先世祁門人家江都文德自祖父來同居四世崇徵庚辰歲饑捐貲倡賑多所存活乙酉揚城

破文德與弟文健詣軍前謁豫王獻三十萬金犒師曰願王下令勿殺王義而許之欲授以官辭曰無才請歸里給一木符令還

康熙府志

鄭之彥字東里本歙人遷江都為郡諸生五世同居稱義門宗伯姜逢元謂其生平然諾無二言閨幃無二色云

康熙府志

劉有恒其先河津人家江都以明經貢太學性慷慨好施與孫長發康熙丁未進士

康熙府志

高孝健江都人世有令德孝健誠愿端謹以義理自勉鄉閭取範焉子以位另有傳

康熙府志

劉有綸字耿邗先世山西人家江都舉於鄉兄弟八人登乙榜者三綸性淳慤言動不苟著書講學不以私事入公府有上相國葉向高論黨禍書時甚稱之子梁嵩另有傳

康熙府志

劉先聲其先關中人家江都崇徵間拔貢尋舉賢良方正性淳篤好急人之難凶歲捐貲倡賑鄉里賴之子師峻順治丙戌舉於鄉芳世康熙丙辰進士

康熙府志

扈國學字翼民明末高傑縱兵擾邗東將及仙女鎮國學率鄉人各持鍋蓋一矛一以禦之號鍋蓋軍事聞給冠帶不受孫際興穀城知縣

康熙縣志

張福江都人黃國相之僕明末福與國相同遇兵國相死福頸被創止氣頹未斷脇下亦被數刃從積屍中以手捧頭匍匐奉主媪匿僻處主媪以弱篋支其頭越數日勢定創亦稍愈始獲送主媪詣北鄉而幼主被繫至金陵福行乞遍走諸營於牧場得之至夜背負歸黃氏母子復聚而福亦終老其家焉

康熙縣志

按元劉信甫明張福皆義僕也其事卓卓可稱述不忍沒焉迺依後漢書獨行傳李善例載入閩者母以分賤而議之

國朝郭光字自瞻江都歲貢生性孝友親歿五十餘年每

念及輒哀形於色伯兄子失於兵傾囊贖歸與已子無異視仲兄孫幼以已子爲之子師友之無後者春秋爲位祀之所輯有四書講義易詩正解晚年猶嗜學不倦舉鄉飲賓子延齡彭齡鶴齡嗣齡俱有文行彭齡字商山康熙丙午舉人嗣齡別有傳

舊志云江都郭氏自明洪武初世居雍熙里歷三百年不遷揚土著未有如郭氏之久者郭本太原人明初戶部侍郎郭任之後也

程量入字上慎本歙人遷江都天性孝友尤能周人之急不求人知亦不望報晚年舉鄉飲賓士民翕然稱服

江都縣志 卷之五 三
子之諛字象六善承父志以倜儻推重鄉黨康熙甲寅
乙卯間軍興旁午之諛籌餉急公有功國計御史郝浴
上其事晉五品秩

史在策江都太學生居常置義學教族黨子弟事師最
謹歲饑煮糜粥以賑疫施榻榻數千瘞死者家僕誤聘
良家女急毀約謝之子恒郡諸生以學行稱孫慶義申
義先後成進士申義另有傳

郭士璋字子秉士璟弟事父以孝聞順治乙酉 大兵
下揚州士璋負父匿興教僧舍承塵上日冒鋒刃懷餅
餌入寺餉父在寺門積屍中聞微息跡之有七人重創

喉斷而未死士璋俱負之就僧舍爲拭漬血以藥傅之
煮糜飼之七人者號呼指使悉應之如其意及創復始
去不問姓氏七人亦不問活我之爲某也隆平後奉父
以壽終子銖字山題成康熙癸未進士由中翰出爲瓊
州府同知奔母喪回毀甚至瓜洲卒孫耕禮康熙癸巳
舉人

閔世璋字象南本歙人世居江都自奉惟老屋數椽布
衣蔬食而遇族黨之貧老孤獨者竭力周之葺學宮新
聖賢像歲稔設法捐賑全活甚多樂善好施之念老而
彌篤通郡皆呼爲善人四舉鄉飲賓卒祀鄉賢其所創

育嬰堂規畫盡善至今仍之子寬亦克紹父業焉
胡夢豸字去邪先世上虞人遷江都性至孝康熙甲寅
年二十二隨父歸越省祖墓父過市遇山賊劫民財豸
父嗔其不義賊怒將刃之豸從後急奔至以椎擊仆賊
市民遂羣起毆殺賊賊衆大至欲屠其里豸曰不可以
我故危一鄉也挺身入賊寨請罪遂被寸磔求遺骸不
可得里族感其義爲購首藁葬歲時致祭焉

梅魁先字占百江都貢生康熙壬戌與友王賓同客都
門賓以百金寄魁先所無一人知者及賓聞父歿哀慟
死魁先歸里至賓家出原金置賓靈几哭而還之

唐詩字盛唐江都人父之天家素饒破產贖還民間子
女之被掠者甚夥母萬氏亦傾篋助之由是家匱乏父
卒母獨教詩讀書詩年十七補諸生旋食餼雅善詩文
工楷書而甘貧守素教授生徒至老得歲薦於榮利泊
如也一中表饒於產而無子憤其弟願以已產立虛券
授詩詩嚴拒不受其不以冥冥墮行類如此子六人皆
有文行由科第仕者四人紹祖繼祖繹祖綏祖

王復衡字山公江都人以恩貢入太學爲熊賜履龔鼎
孳所器重居家篤於孝友宗黨中待以舉火者常數十
人孀姊二俱養於家待諸甥如已子復衡籍儀徵儀正

賦外有五股差徭之累復衡力請督撫勒石永禁通邑德之後以中書需次主事以子貴累封朝議大夫杜門恬退以泉石自娛卒年八十六子誥字楚士丁丑進士歷官司經局洗馬督四川學政諸子及孫數十人多登賢書列明經以文學世其家

程濬字浚遠本歙人居江都父銓孝友工文章歿祀鄉賢濬登康熙丙辰進士官禮部郎爲尙書所倚重出知大名府寬厚和平吏民安輯大名百姓建祠祀之

朱珽字宮載江都諸生天性醇謹潛心理學著有大易捷解嶽起堂文集子潘康熙庚辰進士

卞漢陽字楚度江都諸生弟汾陽以事被逮漢陽代至官引爲已罪官知其誣得免生平周恤三黨敬禮師友人皆稱之孫咸和康熙癸未進士

魏都歲貢生居瓜洲順治己亥海寇猝至都適送母避湖中父尚在城內都急徒跣奔百餘里雜負擔者入城負父出母病膈不能食都奉侍榻前每日止啜粥一盂尤能濟人危急周族姪之媳俾得終節所著有晚香閣集子嘉琬孫元嶧皆舉於鄉

方祖隆字爾郅歙人遷江都有至性母吳病膝行禱於山兩跣盡腫待兩弟友愛誠篤尤能周恤貧乏鄉人德

江都縣志 卷十五
之子覲康熙己丑進士浙江按察使

論曰今之篤行非古之獨行也范曄謂志堅金石而尅扞於強禦意嚴冬霜而甘心於小諒或結朋協好幽明共心蹈義凌險死生等節大抵偏至之行多周全之道少也今則循規曲謹易直端良聞義必爲臨財不苟亦鄉邑之法式也乃如李善之哺幼主王恉之不負亡友昔固足稱近亦有可述者焉

文學四十七人

漢陳子廻顏方俱廣陵人與王充同時充稱之爲班固

楊終傅毅之徒雖無篇章賦頌記奏文辭斐炳賦象屈原賈生奏象唐休谷永並比以觀好其美一也當今未顯使在百世之後則子政子雲之黨也 見王充論衡

皇象字休明廣陵江都人幼工書時有張子竝陳良甫能書良甫適而子竝峻象斟酌於間甚得其妙一時善書者不能及也官至侍中青州刺史人謂象章草入神八分隸入妙篆入能建業有吳時天發識及吳大帝碑在江寧府皆象書也 吳志

唐公孫羅江都人官沛王府叅軍無錫丞曹憲以梁昭明文選授諸生羅與魏模李善相繼傳授其學大行羅

江都縣志 卷十五
有文選註文選音義 唐書

魏模江都人武后時爲左拾遺模師曹憲傳其文選學 唐書

奚陟字殷卿少篤志群書擢大曆進士第又舉文詞清麗科授弘文館校書郎仕終吏部侍郎卒贈禮部尚書世謂陟善於其官智足自處嘗與柳宗元父爲友姓名見宗元所爲石表之陰 萬曆縣志

按唐書列傳陟京兆人趙鶴郡乘謂爲江都人不知何據豈本京兆而徙家江都耶

王紹宗揚州江都人梁左民尚書銓曾孫少勤學徧覽

經史尤工草隸家貧常傭力寫佛經以自給每月自支錢足卽止雖高價盈倍亦卽拒之徐敬業於揚州作亂聞其高行遣使徵之紹宗稱疾固辭又令唐之竒親詣所居逼之竟不起敬業將殺之之竒曰紹宗人望殺之恐傷士衆心由是獲免事平則天驛召至東都擢拜太子文學累轉秘書少監紹宗性雅澹以儒素見稱當時朝廷之士咸敬慕之卒於鄉里 舊唐書

李該字彥博廣陵人學無不通尤好地理圖志患其詞繁載繆法先聖之制黜諸子之傳考職方異同該暢簡核成一家言猶懼後生莫窮其奧又作地誌圖凡禹蹟

江者縣志 卷十五
所至漢譯所通莫不備載乾象坤勢炳焉可觀呂溫藻
翰擅一時於流輩少所推尚從該游獨久稱其爲博達
之士爲序地誌圖云 康熙府志

宋潘闓字逍遙江都人嘗居洛陽賣藥暇日負囊騎驢
看山行吟意有所適終日弗返好事者繪畫圖孫僅魏
野皆有詩贈之至道初有言其能詩者因召見崇政殿
賜進士及第授四門國子博士後坐盧多遜黨變名姓
緇服入中條山嘗題詩鐘樓句竒崛僧疑而迹之逸去
朝廷捕治方急闓度不免出首謫信州移太平結廬郡
治西南瀕溪居焉吟詠不輟詩苦淡清勁劉攽謂其不

減劉長卿後不知所終

姓譜

仲并字彌性江都人紹興進士歷光祿寺丞終朝請大
夫淮東安撫使叅議幼好學強記每一展誦終身不忘
其母嘗屏所觀書几上惟臺曆一冊明且默記纖悉不
誤并爲文閎肆不羈而關鍵整密所著有浮山集十六

卷

萬曆縣志

明張金字伯堅江都諸生博學能詩家貧有節操不俛
仰世態嘗謂其門人某曰貧也奈何某曰聞之天道不
絕善人先生幸自寬金笑曰所恃者此耳後竟以貧終
老曾預修嘉靖惟揚志 萬曆縣志

李自竒字季常先世自陝西遷江都自竒八九歲能誦史記文選諸書父竒之命治舉子業自竒跪而辭曰帖括而役公車兒不願也遂肆力於古文詞尤工六朝小賦及樂府其書篆籀八分行楷靡不工八分尤入妙萬曆縣志

高懋功字世賞少卿澇子登嘉靖戊戌科武進士授錦衣衛左所鎮撫罷還江都故業解盡無以爲家工爲詩尤喜奕陸弼稱其五七言近體駸駸錢劉佳境下亦不失爲戴叔倫温飛卿之流卒年九十萬曆縣志

沈珠字汝淵江都人中正德丙子鄉試卒業南雍從祭

酒湛若水授體認天理之學令永新頗著異政陞南京國子監丞告歸甘泉徒滿四方而珠爲都講迨老益洞徹其旨時人宗之稱艾陵先生萬曆府志

何堅字叔節江都人副使城之弟嘉靖庚子舉於鄉授臨江府通判攝峽江令縣稱治遷潘府審理請老歸以著書爲事闔戶不交當世嘗著律呂書又有漕渠七議當世多采用之始與兄城師事關中呂柟俱力持師說以破群議世稱體道信義者必曰何叔節云萬曆府志

葛澗字子東其先鳳陽人父欽徙江都欽嗜古書構樓五楹藏書數千卷至澗益至萬餘卷江淮間稱積書多

者無如葛氏澗博學有名理坐臥一樓手一編寒暑不廢嘗撰本朝人物編始洪武迄嘉靖數十百卷人爲列傳甚悉少從湛若水游德器深粹年七十餘卒

萬曆府志

周璠字子重江都人以郡諸生補太學性沉鬱刻意爲古文詞嘉靖間授惠安縣主簿旋罷歸初璠與同里史起蟄李應陽葛澗輩竝以博學稱互相切劘璠旣歸諸人雨散獨璠偃蹇故居翛然以著述自喜其書多散逸或爲人乞去惟存邗城子二卷葛澗序之

萬曆縣志

黃一正字定父江都人博涉羣書爲文雄卓典麗屢試棘闈不遇銳意爲詩賦古文詞蠟屐負筴遍游海內過

名山川輒有記廷尉陳王叔好古多聞稱爲畏友司寇王世貞秉人倫鑒見一正曰博學宏辭吾目中僅見定父留之弇山園讀書子明昌十歲侍父客分韻賦金山詩有孤島擎飛鷺狂瀾壓伏牛之句長以例貢入太學驚才絕艷所著有五經埤傳事物紺珠等書

康熙府志

陸弼字無從江都人自髫髻至老治博士家言伊吾吟哦日夜不少廢又好博涉多所撰述廣陵爲南北孔道請延賓客結納賢豪長者其聲籍甚嘗爲詩曰匣有魚腸堪借客世無狗監莫論才何元朗激賞之趙貞吉當國議修正史請徵故知縣王一鳴故同知魏學禮太學

江都縣志 卷一五 三
生王穉登生員陸弼入史館與纂修未上而罷年七十餘卒有正始堂集二十餘卷 列朝詩小傳

按弼曾預修萬曆郡志江都縣志復盡出弼手迄今一百三十餘年證疑攷信猶賴弼書前賢之功未可沒也

白應虛字子直由選貢歷知新樂桂東正陽三縣所在著善政解組還偃仰一室左圖右書尤工五言古詩直窺韋柳籓籬陸弼盛稱之 萬曆縣志

張懋勳字堯光江都諸生性嗜學鍵關兀坐者三十餘年自謂於理學有得所著有二劍齋日編及心學正統

等書

康熙府志

蘇光達字觀五江都諸生性至孝五歲失母哀毀如成人鄰母憫其幼市羞脯啖之拒不食長嗜學家故貧從知交借書課讀冬無完衣環走一室跳踊以敵寒終不輟卷暑夜置足甕中披襟朗誦日出猶篝火熒熒几席間爲文疏達頗得眉山之致性諧曠獨不善佛氏說謂盡性立命聖學本明奈何寂滅詭道其持正如此七試棘闈不遇摧鬱得病死年三十八易簣時尙手持一編

就瞑云

康熙府志

顧大猷字所建夏國公成之裔孫以勲衛帶刀侍從旋

江都縣志 卷十五
謝病歸讀書修韋布之行折節置驛延請四方賓客聲稱籍甚嘗游秦中賦詩弔古留連武功鄠杜間訪問康王遺伎召置坐中青衫白髮歌殘曲道故事風流慷慨長安少年至今傳之用御史薦募兵江淮間兵甫出被讒謫戍赦還母死身病早夜呼憤邑邑不得志而卒大猷事母篤孝撰鎮遠先獻記叙述先人勲績甚備搜採掌故條列時政著書數千卷祕不以示人私謚孝譽先生

列朝詩小傳

宗名世字良弼興化籍江都人萬曆己丑進士初任紹興教授行至夢筆橋夜泊夢江淹以綵筆三授之曰俾

爾三世享文名秩滿陞肥鄉知縣以簡靜鎮俗邑人德之歷陞工部營繕司主事以病乞歸曰可重理邗水魚竿矣年八十卒祀鄉賢所著有發蒙史略一卷含香堂文集十卷子萬化中己酉北直鄉試仕潮州同知灝癸未進士孫元豫元鼎觀俱有文名

康熙府志

李通字伯經江都諸生天啟癸亥禮部徵輯萬曆泰昌兩朝實錄以特恩授廣安州佐

康熙府志

陳以忠字恕先江都諸生性孝友析箸時盡以父產與弟曰吾有硯田可耕也精於易義常曰六爻之義統於大象更爲六十四卦大象說黃汝亨見之曰今之虞翻

也為文宏深典博年六十四卒

康熙府志

蔣善字元長江都人崇徵丙子魁於鄉閉戶安貧研求

邵雍河洛數所著有史記彙十卷

康熙府志

孫鼎字大宣江都人崇徵丁丑進士授大理評事典試

四川所拔皆名雋丁內艱歸不復仕閉門著述吟觴自

終子繼登繼邈皆有文名

康熙府志

徐石麟江都人閉戶著述有趨庭述訓枕函待問北醒

語天人升降圖說等書

康熙府志

魯東錡江都人拔貢生工詩文書畫著有偶然集

康熙府志

國朝熊敏慧字穎生江都瓜洲人順治乙酉舉於鄉布袍

蔬食潛心性命之學兼工古文詩歌旁及書畫晚歲居

宜興張渚怡情山水以終所著有汲冷堂集子維熊字

偉男歲貢生亦以文學知名好表揚節烈著有瓜渚貞

烈志凡殉節婦女各立小傳并系以詩又著閱史約書

十五卷

張標字玉立江都瓜洲人順治壬辰進士授工部主事

權南新龍江二關俱有廉能聲晉郎中歸標為文章根

柢六經鎔錘諸子沉浸醲郁含英咀華論者謂壬辰榜

中標與李來泰戚藩唐德亮相伯仲焉

宗觀字鶴問江都人主事名世之孫以江寧籍中壬午

江南副榜康熙中爲貴池學官數年復遷常熟皆以有師法爲四方所稱道觀性敏好古勤學尤長於詩而襟懷曠朗不問家人生業故其詩蕭疎幽雋近於韋柳新城王士徵甚愛賞之生平篤於朋交皆以問學相取吟詠之外卽無所與謀年七十餘卒於常熟有詩文集各數十卷藏於家從弟元鼎亦以詩名

汪懋麟字蛟門江都人康熙丁未進士授秘書院中書舍人每入直必携書卷竟夜展誦弗輟楚人朱二眉號神仙傾動公卿懋麟獨著辨道論力詆其妄值憂歸薦舉不赴服闋以主事銜入史館與修明史越三年補刑

部主事能辨疑獄尋罷歸敷門絕俗晝治經夜治史以鄭樵通志浩繁手爲減削細書之其爲文法歐曾詩合杜韓蘇陸爲一家所著有百尺梧桐閣集二十三卷兄耀麟字叔定初與懋麟齊名後以諸生貢入成均兄弟最相友愛懋麟官京師被譴時耀麟已先出都門矣中途聞信復北馳扶携而返塤篋倡和無間晨夕耀麟著有抱耒堂諸集共二十六卷子荃郡廩生亦以詩文名於時

吳綺字菌次江都人五歲能詩長益淹貫尤工駢體順治中拔貢生授中書舍人奉

詔譜楊繼盛樂府遷兵部主事歷工部郎中出知湖州府濬碧浪湖構峴山諸亭暇卽與賓客遊觀賦詩郡人凌義渠前明忠臣綺爲構地塋之未幾罷歸貧無田宅購廢圃以居有求詩文者輒以花木爲潤筆因名其圃曰種字林又與文人名士爲春江花月社所著有林蕙堂集記紅集宋金元詩永等書綺壻江闔字辰六康熙癸卯中貴州鄉試工詩古文辭歷任解州有廉能聲高以位字素其孝健長子康熙庚戌進士授中書科中書舍人平居著述後學奉爲楷模家教尤嚴肅弟以佑字天申天性醇謹生平無疾言厲色佑子克暮康熙丁

卯舉人漢陽知府

吳蓮字余嘉江都人幼孤奉孀母苦志力學補諸生食餼以文章知名四方負笈從遊者甚衆垂老膺歲薦惟以著書教子孫爲事有愛日堂文集玉井詩詞若干卷子高佐志祖俱歲貢生孫顓孫康熙庚子舉於鄉

桑豸字楚執江都人早歲能文兼工書畫篆籀旣餼於庠力學篤行推重鄉里丙寅膺歲貢著有編年詩存四十卷文集二十卷廣陵紀事四卷

許承家字師六承宣弟幼與兄刻苦力學同負盛名康熙乙丑成進士改庶吉士授編修年六十餘掌院知其

江者縣志 卷十五
宿學遇有大著作多屬之辛未充會試同考官將循資
遷坊局念兄方里居亦請假相追隨如少壯時及兄歿
思念流涕不置振乏周急於友誼尤篤與人交推心置
腹藹然可親所著有獵微閣集

史申義字蕉飲江都人康熙戊辰進士改庶吉士授編
修歷禮科掌印給事中以疾告歸申義幼穎悟於書無
所不覽爲文宏深矯健不肯一字因人尤工詩初倣西
崑體旣悔其少作殫力研索歛才歸法風格益上

聖祖嘗遣中使至直廬問翰林中能詩者誰爲最大學士陳
廷敬首以申義對焉同懷兄慶義字蔚淇康熙丙戌進

士吏部主事

程文正字笏山之謨子少工詩古文詞善書法尤精制
藝應舉之文康熙辛未成進士筮仕工部都水主事巡
視街道洗手供職不名一錢以疾歸卒年四十有四有
水部遺詩一卷子夢星康熙壬辰進士翰林編修

顧圖河字書宣江都大橋人父九錫有文名多著述圖
河淹洽經史工古文辭書法得虞褚風格方爲諸生名
已噪康熙甲戌登一甲第二名進士時

聖祖覽對策至治河一條曰熟悉形勢必生長江淮留心時
務者自是深被知遇授翰林院編修充日講官直南書

房與修一統志皇輿表考核精詳同館推爲鉅手出視湖廣學政抵任三月卒於官所著有雄雉齋集

吳蔚起字豹文本歙人隨父從殷居江都早年好學屏跡郊外僧舍刻苦文藝康熙丙子舉於鄉上公車不第自悔曰吾學未充也聞宜興儲欣名負笈往從之欣令盡棄其向所學專攻左史及唐宋古文三年業大進癸未成進士授戶部主事歷員外郎郎中皆以恪勤供職擢御史巡視南城有油賈與民構訟持數千金求直蔚起嚴拒不受卒置之法歷掌京畿道事以終養乞歸閉門却掃有造謁者咸辭不見子安國康熙辛卯舉人

楊潛字滙南江都人幼嗜學善詩古文備四體書法以獻賦取入纂修館康熙辛卯舉順天鄉試壬辰

賜進士

改庶吉士授翰林院檢討潛博聞彊記一寓目終身

不忘家貧母老每得俸先封寄以養其母以疾卒於官郭元鈞字于宮士璟子生數歲卽善屬對及長工詩文

聖祖

南巡元鈞以諸生兩次獻詩皆蒙嘉獎取入纂修館

與修佩文韻府又奏請選刻全金詩輯元好問中州集并上之授中書科中書舍人徙直禁苑編金元樂府壬寅夏橐筆熱河初冬病還逾月卒有一鶴菴集牛鳴雙村集

郭嗣齡字引年光子繼光兄奎後奉母以孝聞家貧授徒以修脯爲其兄嫂營喪葬生平講程朱正學所著神化性命通一無二論士林傳之其傳記序說皆具古法康熙乙未成進士授松江府教授潔已課士爲一時廣文之最雍正癸卯浙江聘同考官以病歸學者稱爲述堂先生

陳新楷字依宣江都人父著歲貢生以文行稱楷髫年應試屢冠其曹試藝流傳四方奉爲矩式制行無緣飾孝友純篤其天性也構屋授徒從游者甚盛同時有陳霆發字鳴夏與楷齊名善爲古文辭未遇而歿楷年逾

七十膺歲貢子夢文雍正癸卯舉於鄉

論曰江都自漢吳王濞招集四方之士文辭竝發風流儒雅代有其人而道學之傳惟宋王居正李衡根柢六經崇是黜非爲得正脉明儒浸淫於泰州良知之學去朱子門庭遠矣若夫文章爾雅辭賦閎贍詩社文壇豎旗幢而執牛耳爲東南領袖吳楚騷雅之音固未之絕響也

武勲十八人

宋陳憲廣陵人元嘉二十七年魏侵宋圍懸瓠憲以叅軍行汝南郡事城中戰士不滿千人魏人晝夜急攻作

高樓臨城以射矢下如雨又施大鉤於衝車之端以牽樓堞壞其南城憲內設女牆外立木柵以拒之魏人填塹登城憲督將士苦戰短兵相接銳氣愈奮魏人引兵還文帝以憲爲龍驤將軍

宋書

南齊呂安國廣陵人泰始二年劉劭征殷琰於壽春安國以建威將軍爲劭軍副衆軍擊破琰長史軍安國抄斷賊糧道燒其運車多所傷殺琰衆奔退劭遣安國追之先至壽春琰閉門自守安國屯據城南於是衆軍繼至安國勲第一封鍾武縣男累遷散騎常侍金紫光祿大夫謚肅侯

南齊書

梁呂僧珍字元瑜東平范人世居廣陵童時具封侯相齊建武二年魏大舉南侵梁武帝時爲黃門侍郎率師援義陽僧珍從在軍中請充使至襄陽督遣援軍且獲長沙王懿書而返武帝甚嘉之事寧補羽林監義兵起夜召僧珍及張弘策定議以僧珍爲輔國將軍步兵校尉出入臥內郢州平進前鋒大將軍次江寧東昏將李居士與衆來戰僧珍等要擊大破之乃進軍白板橋居士覘知衆少率銳卒萬人薄壘僧珍謂將士曰今力不敵不可與戰須至塹裏當并力破之俄而皆越塹拔柵僧珍分人上城矢石俱發自率馬步三百人出其後守

裨者復踰城而下內外齊擊居士奔散獲其器甲不可勝計建康城平武帝命僧珍率所領先入清宮帝既受禪以爲冠軍將軍前軍司馬封平固縣侯尋授使持節平北將軍南兗州刺史在任平心率下不私親戚從子宏以販葱爲業欲棄業求官僧珍曰汝等自有常分豈可妄求叨越但當速反葱肆耳僧珍舊宅在市北前有督郵廨人勸徙廨益其宅僧珍怒曰督郵官廨也置立以來便在此地豈可徙之益吾私宅耶卒贈驃騎將軍開府儀同三司謚忠敬

梁書

唐辛讜太原尹雲京孫居廣陵性慷慨重然諾專務賑

人之急咸通十年龐勛亂徐泗時杜悛守泗州賊極力攻城讜夜以小舟穿賊壘至洪源驛請監軍郭厚本救泗厚本然之淮南都將王公弁勸沮讜坐中拔劍矐目謂公弁曰賊百道攻城陷在旦夕公等奉詔赴援而逗留不進更欲何爲卽欲揮刃向公弁厚本持之讜望泗州大哭經日帳下爲之流涕厚本義其心選士卒隨讜入泗夜半斬賊柵大呼由水門而入賊軍大駭退舍人心遂固旣而賊益兵攻城以鐵鑊斷淮流梯衝雲合凡周七月晝夜不息賴讜犯難仗義求救於淮北諸軍會馬舉以大軍至賊解圍而去卒全一州皆讜力也讜無

子猶子山僧元老等寄在廣陵每出城則書二姓名謂
悃曰志之得嗣爲幸悃益感之賊平授讜泗州團練判
官侍御史歷嶺南西道節度使

舊唐書

五代呂師造揚州人爲淮南都將天復元年李神福攻
杭州浙將顧全武列八寨以待之神福使師造伏兵青
山下陽退兵以誘全武伏發全武被執天祐初復從周
本援衢州謂本曰敵去我咫尺而陳不動是輕我也必
擊之是日中道破浙軍師造實與有力焉已又從周本
南伐敗苑玫於上高遷池州團練使師造歷事吳主南
北征伐多在行間所嚮輒摧鋒排陳累官光祿大卿檢

校太保兼御史大卿

十國春秋

明徐司馬字從政小字馬兒揚州人元末兵亂年甫九
歲棄道旁太祖得之因養爲子冒國姓屢立戰功進都
指揮使復徐姓遷鎮河南敕書官而不名其倚重略與
宋國公馮勝埒再擢中軍都督府僉事卒司馬故好文
學遇人無貴賤率煦煦謙厚所至撫循士卒甚得衆心
其在浙東河南尤有惠政公暇退居一室蕭然如寒素
雖戰功不及何文輝而儒雅過之並稱賢將

本傳

顧成字景韶江都人少魁岸膂力絕人善馬槊明祖渡
江來歸嘗從上出舟膠於沙負舟而行從攻鎮江與勇

士十人轉鬪入城被執十人皆死成躍起斷縛仆持刀者脫歸導衆攻城克之授百戶進堅城衛指揮僉事洪武四年從臨江侯入蜀蜀平改成都後衛八年調守貴州討羣蠻平之十四年從穎川侯征雲南爲先鋒首克普定進指揮使十七年平阿黑螺螄等十餘寨降尾灑蠻二十一年討垂西諸蠻擒關索嶺賊渠斬土官阿宗進都指揮同知平康佐都勻諸蠻二十九年佩征南將軍印征水西誅其酋明年討五開蠻九所破六洞一百三十七寨平定貴州官至右軍都督僉事建文元年爲右都督從耿炳文禦燕師戰真定被執燕王解其縛送

北平輔世子居守燕王卽位封鎮遠侯予世券仍鎮貴州成忠謹涉書史始居北平多效謀畫終不肯將兵成祖將北巡召至京命輔太子監國辭時羣小謀奪嫡太子不自安成入辭文華殿因曰殿下但當竭誠孝敬孳孳恤民萬事在天宵人不足措意太子領之十二年卒年八十有五贈夏國公諡武毅孫興祖嗣侯

本傳

蔣貴字大富江都人從燕王起兵積功至衛指揮同知從大軍征交趾及沙漠遷都指揮僉事掌彭城衛事宜德二年從總兵陳懷討松潘諸番進都指揮同知七年命爲叅將佐懷鎮松潘九年諸番復叛與總兵方政分

道進討攻破任昌大寨以次討平龍溪等三十六寨進都督同知充總兵官佩平蠻將軍印代政鎮守其地正統初召還爲右都督會阿台寇甘涼命貴移師討之明年春寇駐賀蘭山後貴破之狼山窮追抵石城泉阿台驚遁已而諜知敵巢將精騎二千五百人爲前鋒出關疾馳三日夜至兀魯乃阿台方牧馬貴猝入馬羣令諸軍以鞭擊弓韉驚馬馬盡佚敵旣失馬乃挽弓步鬪貴縱騎蹂擊大敗之復分軍爲兩翼轉戰百餘里朶兒只伯以數騎遁走西邊悉平封定西伯給世券六年命佩平蠻將軍印征麓川蠻思任發與王驥帥師分三路進

破木籠山七寨及馬鞍山象陣功皆第一師還帝親慰勞進封定西侯八年復與驥討思機發緬人聲音送賊貴密焚其舟大戰一晝夜盡俘其妻孥象馬破壘二百燹寇遂平師還賞賚甚渥十四年卒年七十贈涇國公謚武勇貴起卒伍不識字天性朴實忘已下人能與士卒同甘苦出境討賊衣糧器械常身自負囊不役一人臨陣輒身先之以故所向有功孫琬嗣侯

本傳

蔣琬定西侯貴孫也嗣侯天順末佩平羌將軍印總兵甘肅築甘州沙河諸屯堡成化八年召還協守南京兼督操江十二年入總神機營兵上言北京宜於西北隅

故址增築土城又言大同宣府諸塞下腴田無慮數十萬請按覈定其科額戢豪右毋得侵奪雖不盡行時論韙之十三年帥京軍防秋大同宣府陳機宜十餘事皆報可二十年出禦邊寇累加至太保兼太子太傅卒贈涼國公謚敏毅子驥嗣弘治中充總兵歷鎮薊北遼東湖廣官中外二十年家無餘貲

本傳

許貴字用和江都人永新伯成子也襲職爲羽林衛指揮使久之守備大同西路英宗北狩邊城悉殘貴激戰士以忠義敵來輒擊敗之進都指揮使景泰元年春充右叅將敗寇于威遠奪還所掠人畜再遷都督同知嘗

募死士入賊壘劫馬百餘悉畀戰士士皆樂爲用後以疾還京英宗復辟命理左府事尋以副總兵鎮守松潘未抵鎮而山都掌蠻叛詔便道先翦之貴直抵其巢連破四十餘砦貴亦感嵐氣未至松潘卒帝爲輟朝一日賜賻及祭葬如制

本傳

許寧字宗道貴子也正統末自以軍功爲錦衣千戶父歿嗣指揮使成化初充大同遊擊將軍禦寇擒其右丞把禿等十一人改督延綏地逼河套寇數入掠孤山堡寧提孤軍奮擊三戰皆捷寇渡河走明年復掠康家岔寧出寨追戰又出西路破敵黎家澗進都指揮同知朝

廷以阿羅出復入河套命王越朱永禦之而以寧充總兵官冬賊入安邊寧追擊有功七年又敗寇於混忽都河壘書褒獎滿都魯等屢犯延綏寧率鎮兵力戰寇不得志乃出西路直犯環慶固原寧率輕騎夜襲之鴨子湖殺傷甚衆奪馬畜而還又明年滿都魯等大入西路寧及宣府將襲破其巢進署都督同知築邊牆增營堡寇患衰息弘治初用薦署都指揮使踰年卒贈都督僉事寧束髮從軍大小百十餘戰身被二十七創威名聞異域性沈毅守官廉待士有恩不屑于進

本傳

顧溥鎮遠侯成元孫也年十三嗣侯與諸小侯入國學

用薦掌五軍右掖弘治二年拜平蠻將軍鎮湖廣桑植安撫司土官殘虐溥捕首惡斬之五年冬貴州都勻蠻乜富架作亂梗滇蜀道詔溥充行軍總兵官率兵八萬討之分五路刻期竝進誘誅富架父子斬首萬計加太子太保增祿二百石入提督團營兼三千營掌前軍都督府事十八年卒謚襄恪溥清慎守法卒之日囊無餘貲英國公張懋出布帛以殮

本傳

顧仕隆溥子也嗣侯管神機營左哨得士心正德初出爲漕運總兵鎮淮安十餘年以清白聞數請恤軍卒又請開通惠河時不能用及後開之人果稱便武宗南巡

江彬橫甚折辱諸大吏惟仕隆不爲屈嘉靖初移鎮湖廣尋召還提督三千營加太子太傅掌中軍都督府事論奉迎防守功也錦衣千戶王邦奇怨大學士楊廷和兵部尚書彭澤上疏言哈密失策事由兩人帝怒逮繫廷和諸子婚給事中楊言疏救忤旨事下五府九卿科道議仕隆言廷和功在社稷邦奇小人假邊事惑聖聽傷國體有詔切責移病解營務卒贈太傅謚榮靖本傳仇鉞江都人世襲指揮同知以功陞指揮使充寧夏遊擊將軍驍勇敢戰正德五年安化王寘鐮與指揮何錦周昂等反鉞陷賊中京師訛言鉞亦從賊閣學士李東

陽獨明其不然鉞入城散衆稱病不出陰約侯保勛楊英諸兵至河上從中發爲內應又令人私謂何錦宜急出守渡口防決河遏東岸兵錦果出兵留昂守城鉞稱病亟昂來問疾鉞堅臥呻吟言旦夕且死蒼頭猝起搥殺昂鉞卽披甲跨馬出門一呼諸遊兵壯士皆至遂擒寘鐮追獲錦竝械送京師伏誅論功封咸寧伯食祿千石充寧夏總兵流賊劉六等稱寇畿輔山東河南諸州縣皆爲殘破鉞總兵敗之於狼山海上盡殲其衆進爵爲侯加祿二百石與世券康熙府志顧寰嗣父仕隆侯歷僉中左二府事守備南京奉詔讞

獄多所平反嘉靖十七年爲漕運總兵官漕舟以避梓宮後期者三千而江南北多災傷寰請被災地停漕運一年令改折色軍民交便又條上漕政七事竝施行諸爲漕蠹者病之遂中蜚語爲給事中王交所劾已按驗不實復僉右府再出鎮淮安會安南莫宏灑當襲爲族人莫正中所逐遂有議乘釁取安南者乃移寰鎮兩廣與提督侍郎周延決策送宏灑還國安置正中於邊安南遂定桂林平樂徭反殺縣令討平之復鎮淮有禦倭功入總京營督軍助諸大工作加太子太保復出督漕召還請老隆慶五年特起授京營總督尋乞休神宗嗣

位起掌左府久之致仕加少保萬曆十年卒贈太傅謚榮僖自溥至寰三世皆寬和廉靖內行飭謹曉文藝通賓客世爲督漕善於其職

本傳

喬基世襲揚州衛指揮僉事中武試第三人性孝友父嗜鮭魚及歿終身不忍舉箸弟九人皆異母出基處之無間言精騎射累官京營叅將以病歸嘉靖間倭寇通州當道就家起之屢著戰功復授蘇松叅將倭再寇通州又大敗之於狼山下未幾病卒橐裝如洗子孫寄栖

官廨焉

萬曆縣志

王繩堯字又元江都人祖父及堯俱以武科舉鄉榜第

一天啟壬戌成進士累官四川南路總兵松潘威茂間大著威望土司奢酋犯順繩堯設計殄之銷鋒鏑為錢鑄洞獠咸感其德繩堯少事文墨有儒將風告歸年八十六卒蜀人立祠祀之

康熙府志

國朝楊捷字元凱其先寶應人以世襲指揮家遼左順治

初授山西遊擊擊破太行賊陞副將討江西叛將金聲桓恢復九江南康諸郡陞總兵官鎮九江尋討賊粵東克潮州累加左都督太子少保移鎮揚州改山東提督平東萊之亂福建海氛作再晉少保兼太子太保提督福建水陸軍務至則先攻定海以分賊勢隨合師從惠

安搗賊老營克之先是泉州陷於賊既克制府欲屠之捷沮得免以功加昭武將軍時賊尙屯漸山等處分十九寨捷先取諸島嶼連建七營調集八槳各船示以欲渡賊受制不能分應遂破十九寨隨咨督撫訂期三路進攻積寇平以原銜管江南提督事授世襲三等阿達哈哈番

賜籍江都卒年七十有四贈少傅謚敏壯子懋緒懋紹懋綸

皆官監司孫鑄古北口總兵

論曰隋書云江都人性躁勁風氣果決視死如歸豈其負勇好戰士風然乎今讀武臣諸傳折衝制

江者縣志 卷十五
勝之畧攻伐敵愾之勲奕葉相承後先爭烈足以
書旂常勒鐘鼎盟帶礪矣書曰尙桓桓如虎如貔
如羆如羆江都武勲卓乎懋哉

隱逸十四人

漢應曜淮南人漢初與四皓同被徵不至時人爲之語

曰商山四皓不如淮南一老

嘉靖惟揚志

晉韓績字興齊廣陵人少好文學以潛退爲操布衣蔬
食不交當世由是東土並宗敬焉司徒王導聞其名辟
以爲掾不就咸康末會稽內史孔愉上疏薦之詔以安
車束帛徵拜博士稱老病不起卒於家

晉書

唐李孝感江都人博學好古雅修彭聃之道與天台鍊
師司馬子微爲方外之交尤以篤慎著於州里考行議

德謚曰正隱先生

金薤琳瑯

宋孔旻淮南人隱居篤行終身不仕美節高行

沈括夢

溪筆談

明王貞字以道江都人元末避地吳下張士誠以德清
教諭授之堅辭不屈洪武初歸江都葺茅舍以居

嘉靖

惟揚志

楊寅江都人府學生永樂初召書令字旗高丈餘一揮
稱旨賜金帛鞍馬命署泰州辭不拜後徵入京乃避地

江都縣志 卷一 五
於晉十年方回有詩曰洪武仁風萬國柔書生不厭敝
貂裘半天雲氣不成雨滿目波光都是秋時盛漫勞思
共濟才疎焉敢望封侯放歌古調歸來晚江上無人月
一鈞 嘉靖惟揚志

王醇字先民揚州人生而早慧讀書如夙識弱冠善辭
賦陸無從李本寧交相引重意不屑也從季父遊長安
日醉市樓人求識面不可得會麻大將軍大閱將士先
民輕裘快馬馳突演武場引弓破的矢矢相屬掣雙劍
飛舞霎忽如崩雪大將軍降階執手欲舉以冠一軍先
民笑謝家本書生聊用遊戲耳父母命之室以羸病辭

爲兩弟納室徧遊吳越佳山水日參內典歸廣陵之慈
雲菴顏其室曰寶藥樓自知時至結跏匡坐而終 列朝
詩小傳

張奇字正甫江都人初學制舉入郡學久不屑意學詩
畫皆極工家貧而傲日與郡之賢士大夫游中年喜天
官象數家言當萬曆季遂移家金陵及馬阮輩竊權寵
附者如靡知處士名造焉不報閉門以老預尅死日自
題其棺曰飲白水四十餘日遂歿年七十有四 康熙府
志

國朝雷士俊字伯籲先世涇陽人居江都之艾陵湖士俊
幼爲諸生後棄去專力於經史百家熟悉古今治亂得

江者果志 卷一五 三
失之故辨別君子小人消長進退之機其爲文鉢心劇
胃旣脫稿猶必琢磨再四始出以示人而貧老負氣悲
憤得疾以卒所著有艾陵集文二十卷詩二卷祀郡學
鄉賢長洲尚書韓茨贊其像曰弘道其如命休論行與
藏先生老被褐已升作者堂艾陵書一編窮理析寒芒
一時來學者千里或裹糧而我生也晚不及弟子行俎
豆側嘗聞幽微宜闡揚豈不符甲令忍獨私庚桑邢溝
舊里居我來炷瓣香其推服如此

史以甲字子仁江都邵伯人明按察副使啓元之子幼
補郡諸生長乃絕意場屋隱居艾陵湖東之橋墅耕讀

自怡足跡不入城市自天文地理以及方伎醫藥百氏
之書無不究覽所輯文獻通考抄三十卷學圃隨筆十
卷勾股籌筭捷法二卷傷寒正宗七卷皆刊刻行世復
廣吳淑事類賦爲七十卷書成而歿子炤能述父業著
有方輿槩十五卷曾孫步高雍正丙午舉於鄉

葉彌廣字博芝江都人生賦異才臨文不假思索搦管
卽書迅如泉湧以諸生高等貢入太學不樂仕進惟散
服逍遙怡情詩酒康熙十二年纂修通志郡縣聘彌廣
任其事咸稱得人一日雪滿庭堦彌廣欣然浮白賦詩
盤桓竟日忽訣家人曰吾逝矣遂卒年七十五彌廣同

時有強惟良阮玉鉉皆高曠稱博學士林重之
宗元豫字子發江都人潮州府判萬化子也萬化卒於
潮元豫行萬里扶櫬歸而囊空如滌不能買地以葬乃
疏食不除服餘十年始得葬自是遂不求仕進惟肆力
經史發爲文章具有根柢同郡王巖於人少許可而獨
盛推元豫以爲脫略凡近直造古人寧都魏禧嘗與往
復辨論禮制亦歎其難及性廉介不與俗流欸曲雖敝
衣糲食恒自憇也著史論數十篇皆前人未發雜文亦
數十卷別有識小錄若干卷紀廿一史中瑣事爲里人
所傳

蔣易字前民江都瓜洲人少補諸生卽棄去家故饒有
洲田數十頃埤於江遂致窮餓意泊如也爲詩不取時
好五言律尤勁健得少陵風格黃岡杜濬與友善甚稱
之晚年無子家益窘賣畫自給人得其寫生一二筆爭
以爲寶焉

論曰易稱乾初爻之潛謂不易乎世不成乎名遯
世无悶不見是而无悶隱蓋若是之難也彼丈人
漁父姓氏俱泯邈乎遠矣若晦迹野處不汲汲於
勢利熏灼之場褐衣蔬食蕭然窮餓甘心著述以
老其身則雲達之鴻臈繳不及樗社之木斤斧不

加豈非超然塵垢之外獨善其身者哉

僑寓十五人

五代游簡言字敏中父恭仕吳知制誥卒於任簡言因
僦居廣陵少孤力學以薦入徐知誥幕府齊國建職內
史舍人一時典冊皆出其手筆知誥代吳擢翰林學士
及南唐主璟立晉禮部侍郎獨不附權要事非其任者
未嘗肯言璟雅重其爲人命判中書省兼吏兵二部選
事裁抑僥倖吳越攻常州執團練使趙仁澤歸錢塘仁
澤不屈吳越王決其口至耳議遣使詰責羣臣畏懾莫
敢往璟乃命簡言簡言不辭未出境召還璟命簡言輔

太子力辭嘉其無徼後福意後主亦由是賢之拜吏部
尚書親治簿書督責嚴峻人或以事請托必固違拂議
者譏其太過以左僕射兼門下侍郎同平章事卒謚宣

靖 十國春秋

宋孫侔字少述吳興人與王安石曾鞏遊名傾一時早
孤事母盡孝志於祿養故屢舉進士及母病革自誓終
身不求仕客居江淮間士大夫敬畏之劉敞知揚州言
其孝弟忠信足以扶世矯俗求之朝廷呂公著王安石
之流也詔以爲揚州教授辭敞守永興辟入幕府亦辭
英宗時沈邁及王陶韓維連薦之授忠武軍推官常州

判官皆不赴少與安石友善安石為相過真州與相見
俸待之如布衣交卒年六十六初王回王令常秩與俸
皆有盛名回令不壽秩為隱不竟唯俸以不仕始終

宋史

按儀徵志亦載孫俸宋哲宗實錄云俸義不得仕

客居吳門吳興丹陽楊子間是所居固無定處也

俞紫芝字秀老其先金華人徙家江都少有高行不娶
好浮屠氏學所至翛然工為詩王安石居鍾山紫芝數
與往還尤愛重之與其弟清老從黃庭堅遊黃所書釣
魚船上謝三郎一帖石刻金山寺雞林每入貢輒市搨
本數百以歸即紫芝詞也

萬曆府志

趙訓之字誨道宣和末盜起河北訓之屢言契丹舊盟
未可渝金人新好未可恃未幾金人犯京師訓之寓揚
州募士勤王建炎三年知永豐縣禦賊被害詔贈朝散
郎直秘閣謚忠果

萬曆府志

元蘇大年真定人年十五遊學廣陵因家焉文辭翰墨
皆絕出時輩而不受辟舉至正間上書於朝官以編修
平生著述甚多自號西坡又號林屋洞主

姓譜

明高宗本字茂卿太倉鎮海衛人景泰間進士授南道
御史巡視中都倉糧兼武弁強悍侵漁官廩者寘之法
清理四川軍伍摘其匿漏者四千六百有奇監軍討賊

暨整飭三邊軍務劾將軍李杲行師不律以勞績陞河南按察副使獄多平反尋以老家於江都自號江淮逸叟郡大夫延修惟揚新志若干卷自著有復齋稿江淮雜稿各若干卷卒葬揚州

嘉靖惟揚志

王璠字廷瑞陝西人成化甲戌進士累官山西布政使叅議時劉瑾專橫縉紳喪氣璠性耿介不能屈因罷職僑居江都子延祀中應天辛卯鄉試知單縣未幾亦致政還父子俱有廉吏名

萬曆縣志

張齊字聖甫長安人原籍興化嘉靖壬子中陝西鄉試已未成進士除真定府推官以治行卓茂召為戶科給

事中陞光祿寺丞會大學士高拱罷論者以齊為拱所取士併放還齊復家揚州晚習為詩歌書法宗趙孟頫為園城西雜蒔花竹與名流談文藝竟日不倦後貧三徙其家去華就樸處之怡然

康熙府志

鄒應龍字雲卿陝西蘭州人其父賈揚州遂家焉初名貫補揚郡弟子員尋還蘭州易名中嘉靖乙卯陝西鄉試登丙辰進士由行人擢廣西道御史劾相嵩及其子世蕃欺罔不法事十餘條時嵩父子擅柄虐焰赫然言者輒死應龍疏上青衣待罪眾人共危之世蕃出朝盱衡大言曰何物御史不愛死而及余家事俄命嵩致仕

江都縣志 卷十五
世蕃卽訊謫戍上嘉應龍忠擢通政司叅議朝宇肅清
中外無不想望風采尊陞副都御史巡撫雲南至卽劾
黔國公沐朝弼不法事奪爵旋以征洞獠言者謂其開
釁罷還尋復原官致仕卒 康熙府志

費經虞字仲若新繁人崇徵己卯舉四川鄉試授昆明
令土司吾必奎作亂黔國公討之俘三百餘人將盡戮
焉臺使者檄經虞審理皆脇從之民力請釋之俱得全
活陞同知乞休歸蜀遇亂間道走秦流寓於揚所著有
毛詩廣義二十卷四書字義一卷雅倫三十卷臨池懿
訓三卷註周易叅同契三卷子密 康熙府志

國朝趙開心字洞門長沙人前明甲戌進士入 本朝官

至工部尙書解組後僑居江都與人交披肝露膈有公
事輒首任之未嘗以寓公自諉也卒 賜祭葬

張恂字穉恭涇陽人前明癸未進士工詩古文又善畫
居江都最久與之遊者多喜其樂易而揮毫潑墨縑素
淋漓故家笥篋中多珍藏之

孫枝蔚字豹人陝西三原人幼爲諸生遭流寇與其鄉
少年奮戈逐賊落深塹得不死乃走江都從賈人遊三
致千金三散去旣而閉戶讀經史肆力於詩古文辭名
噪海內康熙己未以博學鴻儒徵授中書舍人歸著有

漑堂前後續集

費密字此度新繁人父經虞前明孝廉僑寓江都密從
萬里戎馬中隨其父至居野田莊傳其父業工詩古文
客中俯仰惟取給於授徒賣文人咸重其品而悲其遇
所輯有弘道書十卷正紀一百二十卷聖門舊章二十
四卷自著詩古文辭二十二卷子錫琮錫璜皆能文
王巖字築夫寶應人初名天佑爲諸生及更今名專肆
力於古文辭其考古論事必引據經傳無一字假借行
文根柢於班馬筋力於韓柳諸家客寓江都最久與孫
枝蔚雷士俊輩最契合文場後進有執經請業者經其

指授輒可名一家故遠近人士翕然稱之著有白田詩
文四十卷異香集二卷

論曰江都五方萃處遊宦貿易而至者多相宅而
居焉其先世占籍茲土者則入土著其及身卜居
茲土者則爲僑寓廼有行業著聞文章流譽劒氣
珠光到處輝映例得借書以光邑乘焉

戚畹三人

明陳公逸其名揚州人淳皇后父也宋末從張世傑軍
厓山世傑死陳公舟亦敗得脫棲海島糧絕同棲者將
往鬻髀山食死馬陳公夢白衣人戒曰勿往食夜有舟

至可共載也寤而如戒是夕又夢紫衣人杖叩之曰起
起舟至矣陳公驚起則已在元帥某舟中蓋公舊所事
統領官降於元將憐而載之也將有令母留附舟人統
領官匿之皇板下取食飲從板隙投之事將洩忽颶風
大發將懼甚統領官白公有巫術令出而詛之風果止
遂予公飲食送歸揚州公由是棄軍籍避地盱眙以巫
術行久之生二女其季卽淳皇后也公無子年九十九
始卒洪武二年追封揚王媪爲王夫人立祠太廟東明
年有言王墓在盱眙者中都守臣按之信帝乃命中書
省卽墓次立廟設祠祭署奉祀一人守墓戶二百一十

家世世復而諭翰林學士宋濂文其碑撤太廟東祠

本傳

尹清其先華陰人襲官揚州衛洪武二十七年清授徒
京師選尙舍山長公主高皇帝妃高麗韓氏所生以早
失母最爲高廟所愛賜予特盛清授駙馬都尉卒贈光
祿大夫

嘉靖惟揚志

趙輝字孟暘其先宋宗室扈從南渡遂家江都父和府
軍後衛千戶征交趾歿輝方七歲長以廕官備宿衛太
宗命尙太祖寶慶長公主拜駙馬都尉英廟北狩輝留
守京城卒年八十二

嘉靖惟揚志

論曰夫婚姻帝室華轂朱輪富貴蟬聯如漢許史

之繁竇馬之戚固無足异若崛起於草茅微賤之中因緣會合一旦攀龍附鳳致王侯列土之貴斯殆天命非人力也然其先世積德累行以致此顯赫者亦豈偶然也哉

藝術十三人

三國吳普廣陵人與彭城樊阿皆從華佗學普依準佗治多所全濟佗語普曰古之仙者爲導引之事熊頸鴟顧引輓腰體動諸關節以求難老吾有一術名五禽之戲一曰虎二曰鹿三曰熊四曰猿五曰鳥亦以除疾並利蹄足以當導引體中不快起作一禽之戲沾濡汗出

因上著粉身體輕便腹中欲食普施行之年九十餘耳

目聰明齒牙完堅

魏志

唐李含光孝感之子年十八志求道妙遊藝數年神龍間乃度爲道士深得老莊周易之趣執父喪過哀食惟穢麥號毀骨立親族莫不傷之開元間從司馬子微於王屋山傳授大法靈文金記一覽無遺元宗知之召居王屋山陽臺觀歲餘請居茅山賜號元靜先生大曆間遜化於紫陽之別院春秋八十有七弟子赴喪而至者千人含光少頗工篆籀而隸書尤精妙客嘗賞之謂賢於其父因投筆不書平生所著有本草音釋二卷老莊

周易學記義略各三篇內學記二篇道學傳二十卷顏
直卿曰先生能於陰陽數術之道而不以藝業為能極
於轉鍊服食之事而不以壽養為極但冥懷素朴好味
元津非夫博大之至人其孰能盡於此 萬曆縣志

石藏用廣陵人仕唐為羽林大將軍明於曆數嘗謂家
人曰天下將有事而蜀為最安處乃去依其親眉州刺

史李隔遂家焉石揚休其後也 萬曆縣志

宋荆大聲江都人貧去鄉里貨卜於臨安以明曆入太

史局歷靈臺郎終於春官大夫判太史局賜金紫 姓譜

陳偕廣陵人家故饒財偕獨喜學畫其後伎日以進家

日以微遂以為業士大夫喜其畫往往稱之偕曰物物

有形如浮埃聚沫來無所從去無所詣一與一債於無

窮之中而我方汨汨然隨而畫之可不惑歟顧家貧無

以給衣食聊復俛仰其間爾子直躬亦世其學 秦觀淮海集

衛朴淮南人精於曆術一行之流也自夏仲康五年癸

巳至熙寧六年癸丑凡三千二百一年書傳所載日蝕

凡四百七十五眾曆考驗雖各有得失朴所得為多 沈

括夢溪筆談

元王仲明揚州人廉希憲疾久不愈元帝詔徵揚州名

醫視希憲疾既至希憲服其藥能杖而起帝喜謂希憲

日卿得良醫疾向愈矣

元史

明陳君佐江都人善方脈洪武初為御醫永樂間棄官
着黃冠市藥武當山中以易卜人吉凶多奇中卒葬山

中石穴

康熙府志

吳承嘉江都諸生幼孤事寡母極孝嗜古學尤研心六
書自篆籀八分行楷擘窠正草靡不精妙一時隴墓碑
版金石之文多出其手

萬曆縣志

方選字以賢江都人精於醫稍有贏餘輒以給宗鄰之
困者嘗拾遺金於道訪其人歸之仲子新精奕有神解
選嘗與客奕新甫六七歲置膝上觀之辟呬語選客某

道瑕可攻不信客竟備不敗比收局客戲謂新曰童子
知吾瑕乎吾不畏攻也新再為布子如前不差一道指
選攻之客大敗比州角郡中人皆無敵手王世貞過郡
邀新與其客李時養奕時養者海內稱第一品也新初
遜李一子翌日則已雁行矣

萬曆縣志

汪浩字德弘本徽人隨父遷江都浩少工繪事類吳偉
戴進杜堇唐寅諸家詩詞亦饒宋元人風味客每過隨
意具黍醴清言雅謔人忘去

萬曆縣志

國朝查士標字二瞻休寧人居江都以書著名尤長於畫
摹倪瓚得其遠神而性迂好潔亦復似之求畫者視其

人可交俄頃即應否則投以重幣強要致之終不應也
流傳人間者書多畫少雖片幅人珍貴之

蕭晨字靈曦江都人少善讀書不習制舉工於繪事尤
以人物擅場其法以取神為上而不屑屑趨步前人所
作雖粗服亂頭皆有丰韻四方人爭購之晚好為詩多
逸致在倪瓚沈周之間

論曰方伎藝術之事先王不廢見於諸史傳者可
攷而知也顧醫必佗卜必輅相必建平丸必僚奕
必秋書必斯邈畫必顧吳求之今古憂乎難矣若
一邑之士一才一技之良聚精殫神攻之終身而

擅長於一時亦志乘之所必錄也

百齡人瑞七人 男婦並載

五代吳琬江都白砂村人壽過一百歲步履康健視聽
不衰州府問勞俱稱翁父元嗣在日義聚不分守臣聞
於朝特賜旌表 神仙通鑑

明倪氏江都人丁元素妻砥節守貞壽至一百有四歲
互見列女傳 舊縣志

田氏江都人丁達妻壽登百歲奉旨旌表建坊小東門
內 舊縣志

國朝熊氏閔源妻本歙人居江都康熙辛亥年壽登百歲

孫本正姚安府知府

朱文鼎字公調東鄉許家閘人康熙丁酉年壽登百歲子勉仁入太學孫履中雍正癸卯武舉人

胡士魁江都縣民康熙庚子年壽登一百有一歲有司上其事奉

旨建坊旌表

劉氏邵伯鎮人許長卿妻雍正甲辰年壽登百歲

論曰草木之衆松柏不彫鱗介之繁龜龍獨久物固有然矧人爲萬物之靈乎洪範五福其一曰壽詩頌魯侯永錫難老太平之世人享遐齡久道化

成於斯盛矣

仙釋三十人

漢華子期淮南人師用里先生受山隱靈寶方一曰伊洛飛龜秩二曰白禹正機三曰平衡按合服之日以還少一日行五百里能舉千斤一歲十易皮後乃得仙去雲笈七籤

朱璜廣陵人少病毒瘕遇睢山道士阮邱邱曰卿除腹內三尸可授以真人之藥璜謝曰當爲君作僕遂與藥七令日服九九百日病下如肝脾者數斗越數旬肥健心意開朗又授以黃庭經使日誦三過乃同邱入浮陽

山後八十年復見故處白髮盡黑至武帝末猶存神仙

杜姜廣陵東陵亭女子左道通神縣以爲妖收之獄變

形莫知所之狀聞卽其處立廟祀之號曰東陵聖母後

漢書

晉茶姥居廣陵不知姓氏嘗如七十歲人而輕健有力
耳聰目明頭髮鬢黑晉元帝南渡後耆舊相傳見之百
餘年顏狀不改每持一器茗往市鬻之市人爭買自旦
至暮所賣極多而器中茶常自盈未嘗減少人多異之
州吏以冒法繫之獄姥乃持所賣茗器自牖中飛去雲

笈七籤

隋徐則在縉雲山學道晉王廣鎮揚州知其名手書召
之遂詣揚州晉王將請受道法則辭以時日不便其後
夕中命侍者取香火如平常朝禮之儀至於五更而死
支體柔弱如生停留數旬顏色不變晉王遣使送還天
台定葬是時自江都至於天台在道多見則徒步云得
放還至其舊居取經書道法分遺弟子仍令淨掃一房
曰若有客至宜延之於此然後跨石梁而去不知所之
須臾屍柩至方知其靈化時年八十二晉王聞而異之
賜物千段遣畫工圖其狀貌令柳詵爲之讚隋史

唐馮俊廣陵人貞元初以傭資生多力而愚遇一道士於市買藥囊重約百斤募能負者俊請行至六合從登舟令俊伏船中道士獨引帆如在空中食頃召出已在廬山星子灣矣令俊負藥行五六里至山下有一大石道士扣之分爲二引俊入穴其中洞明有大石堂勅俊捨藥命左右曰擔人饑與之食以胡麻飯一碗漿與之送出授錢千文令繫腰下授以丹藥百餘粒曰日食一粒可百日不食一石臥如虎令俊騎上閉目道士鞭石覺在空中飛炊許躡地開目已在廣陵郭門矣視腰下皆金錢也俊遂爲富民登上壽不知所終

康熙府志

李珏廣陵江陽人以販糴爲業每斗求利兩文以資父母有糴者卽授以升斗俾自量丞相李珏節制淮南夢入洞府見石壁金書姓名有李珏字方喜忽二仙童云此乃江陽部民李珏耳卒年百餘歲

嘉靖惟揚志

康紫霞東陵聖母廟女道士也少時夢中以天符攝將軍巡南岳須臾間岳中峰嶺無不歷覽恍惚而覺自是生鬚數十莖里人立廟祀之號曰仙女

酉陽雜俎

劉白雲江都人家富好濟人遇道士樂子長出兩卷書與之能役致風雨變化萬物於襄州隔江山上結紫雲幄化兵士數千人侍衛連月不散節度使于頔疑其妖

使兵馬使攻之弓矢不能及白雲乘馬走漢水上蹙波
起塵如履平地追之不得人有見其辰發靈州午已在
湘潭須臾七百里矣復於江都值樂真人授以金液九
丹之經乾符中猶在長安市賣藥尚有識之者康熙府志
劉商彭城人擢進士第歷臺省為郎中棄官訪道及廣
陵城有道士賣藥於眾中見而異之携登酒樓所談秦
漢歷代事皆如目覩及暮歸道士下樓倏不見翌日商
於市訪之道士仍賣藥見商愈喜復挈上酒樓劇談歡
醉出一小藥囊贈商并戲吟曰無事到揚州相携上酒
樓藥囊為贈別千載更何求別去累尋不復見商開囊

服藥身輕遂為地仙雲笈七籤

宋傅鴻揚州進士棄家雲遊至終南山太平宮出家修
奉上真香火忽夜睡寢知宮張守真潛往叩鴻聞鴻睡
中似與人語忽有火光從鴻寮內迸出守真異之明早
問鴻鴻曰今當限至遂沐浴易衣昇堂聽受真武真君
降言云三月桃花景色天萬般真瑞一時妍金枝寶運
從新令仲節當迎赤脚仙次日鴻潛遁去不知其蹤後
於明德宮降慶奉旨立祠贈號勝因真人神仙通鑑
鄭搖鈴素遊京師常持一銅鈴搖鳴闐闐間丐錢用餘
則分惠貧者號為鄭搖鈴宣和末忽來維揚搖鈴丐錢

如故夜則寄宿逆旅久之謂主人曰吾將死願以隨身衣物悉寘棺中而焚之已而果死主人如其言昇棺出城舉者覺漸輕復聞鈴聲如在數十步外俄而鈴聲漸遠則棺愈輕若無屍至焚所啓蓋視之惟一竹杖而已

郭彖睽車志

以上仙

晉佛馱跋陀羅西域梵僧也華言覺賢釋迦種姓南來揚州擇地而止天寧寺覺賢能通華言席地趺坐翻譯華嚴經時有兩青蛇從井中出變形青衣童子供事遂立爲伽藍主永初二年宋主聞其賢欲迎致之覺賢遂遁去不知所之

嘉靖惟揚志

曇詵廣陵人幼從遠公出家勤修淨業兼善講說註維摩經行於世常著窮通論以明宿修述蓮社錄以記往生又能別識鳥獸毛色俊鈍之性洞曉草木枝榦甘苦之味妙盡其理人知其有密證云元嘉十七年集衆謂曰自建寺以來至此五十年吾之西行最在其後卽跏趺念佛百聲閉息遂絕春秋八十

蓮社十八高賢傳

宋法莊俗姓申淮南人十歲出家爲廬山慧遠弟子少以苦節標名晚遊關中從叡公稟學元嘉初出都止道場寺誦大涅槃法華淨名每夜諷誦比房常聞莊房前有如兵仗羽衛之響實天神來聽也宋大明初卒於寺

時年七十有六

高僧傳

史宗常着麻衣或重之爲衲號麻衣道人喜怒不常日往廣陵白土埭謳歌自適夜不知其宿處江都令檀祇召至與語詞多無畔岍索紙賦詩曰有欲苦不足無欲卽無憂未若清虛者帶索披麻裘浮遊一世間汎若不繫舟要當畢塵累棲息老山邱檀祇異之

高僧傳

竺慧慶廣陵人出家止廬山寺學通經律清潔有戒行誦法華十地思益維摩每夜吟諷常聞閻中有彈指讚歎聲嘗於小雷遇風波船將覆沒慶惟誦經不輟覺船在浪中如有人牽之倏忽至岍於是篤厲彌勤宋元嘉

末卒春秋六十有二

高僧傳

慧益廣陵人少出家隨師憩竹林寺精勤苦行誓欲燒身大明四年始却粒惟餌麻麥到六年又絕麥但食酥油有頃又斷酥油唯服香丸孝武深加敬異遣太宰江夏王義恭詣寺請益益誓志無改至七年四月八日廼於鍾山之南置鑊辦油朝乘牛車之山就焚帝駕親臨諸王后妃道俗士庶填滿山谷益乃入鑊據一小牀以吉貝自纏上加一長帽以油灌之將著火帝命太宰喻曰道行多方何必殞命益確然無悔重以佛法憑囑廼手自執燭以然帽帽然已廼合掌誦藥王品火至眉誦

江者鼎志 卷一五
聲猶分明及眼乃昧貴賤哀嗟莫不彈指稱佛帝於時
聞空中笳管異香芬苾後詔於燒身處起藥王寺以擬
本事也 續高僧傳

梁道達俗姓裴河東聞喜人住廣陵永福精舍少以孝
行知名拯濟危險道潤江濱永明中爲南兗州僧正在
職廉潔雅有治才罷任之日惟有紙故五束 續高僧傳

惠命廣陵人住安樂寺開濟篤素專以成實見知 續高僧傳

隋智鍇姓夏侯氏豫章人少出家在揚州興皇寺聽朗
公講三論善受玄文有名當日開皇十五年遇天台顓

公修習禪法特有念力顓歎重之晚講涅槃法華及十
誦律弘敷之盛見重於時又善外學文筆史籍彌是所
長春秋七十有八 續高僧傳

惠璉俗姓吳揚州江都人七歲依榮法師出家仁壽中
從榮被召住於禪定寺大業末郊壘多虞寺衆推璉善
能禦敵乃總集諸處人畜在昆池一莊多設戰樓用以
防禦時司竹羣賊鼓行郊野所至摧殄無抗拒者兵臨
莊次璉登樓一望但見張旗十里乃收束弓刀反縛奴
僕大設餽饌廣開倉廩身先入陣勞問軍主引至莊中
命令就坐旣見盛設相與開顏飽噉而旋唯取牛十頭

擬勞軍士牽至中道璉後從乞皆用還之是以通莊竝
潰唯有禪定如舊春秋五十餘終於本寺

續高僧傳

智聰未詳何許人陳平後渡江住揚州安樂寺大業末
思歸無計隱江荻中誦法華經七日不饑有四虎遶之
而已不食已經十日聰曰吾命須臾卿須可食虎曰造
天立地無有此理忽有一公年可八十掖下挾船曰師
欲渡江棲霞住者可卽上船四虎一時目中淚出聰曰
救危拔難正在今日可迎四虎於是利涉往達南岸船
及老人不知何在聰領四虎同住棲霞院中若有凶事
一虎入寺大聲告衆由此警悟每以爲式聰以山林糧

粒難供乃合率揚州三百清信以爲米社人別一石由
此山糧濟給貞觀二十三年四月八日禮大師影像安
坐而卒時年九十九矣

續高僧傳

唐靈一俗姓吳廣陵人九歲出家十三斷髮先世爲富
家旣削髮推萬金之產讓諸昆季所取者惟衲衣錫杖
而已初舍於會稽之懸溜寺徙居餘杭宜豐寺著法性
論禪誦之隙輒賦詩歌與皇甫冉張南史等爲塵外之
友寶應元年冬終於杭州龍興寺春秋三十有六

獨孤

及毘陵集

大師佛唐貞元中客廣陵居孝感寺質甚陋衣總繭裘

盛暑不易蝨蟻聚其上又性狂悖日與少年鬪毆人稱其有神力一老僧訶止之師罵曰蠅蚋徒嗜腥羶安能知龍鶴之心哉老僧不能難一日自外來歸入室閉戶有於門隙視者見師坐於席有光自眉端發晃然照一室觀者奇之具告羣僧相率而拜及啓戶則已逝矣號為大師佛

萬曆府志

舉直懿宗子也游方抵揚州詔以太平倉基地為鎮國禪院居之後葬於院隅立浮圖五級宋元豐末發隧得函柩全骨鈎聯不解舍利發光人以為異

嘉靖惟揚志

宋贊寧有文學洞古博物著書數百卷太祖禮之王禹

偁輩常就質疑柳開守惟揚贈之詩有空門今日見張華之句荀譜其所著之一也

嘉靖惟揚志

元志如揚州普門庵僧元至大二年志如置地若干畝至順間創建佛殿塑諸天法像元統三年築三塢於江都之永貞鄉志如囊鉢不設一錢以其說動人或伐材於山輦石於淵捐金於帑遠近相助其應如響學者來無虛日志如待之未嘗厭倦又制為規訓以次相傳於後年七十有五而終

危素悅學齋集

明道彛字天倫揚州府天寧寺僧戒行精專博通內典與少師姚廣孝友善永樂中奉使日本卒於其國臨終

作偈曰來不為多去不為少六十六年一了便了嘉靖
惟揚志

德音號海潮揚州府建隆寺僧精於數學嘗有叩門者
僧呼曰東鄰某借鉏執出與之開門果然一日方飯有
人問其父疾曰當即愈飯畢又有人來問病曰淹久不
瘥但未就木有頃又有人問疾聞厨中滌器聲曰噫死
矣已而皆如其言其徒詢其故曰始吾方飯飯則生理
知其當愈既飯則漸去食知其淹久滌器則入櫃櫃棺
象也以是知其死矣嘉靖惟揚志 以上釋

論曰方外之流飄然雲水以天地為蘧廬六合為

傳舍浮游往來於虛無寥廓之境豈可限以方隅
哉顧人之生也必有其地杖屐所經瓢笠所止亦
有所石壇幢影蘭若經聲人猶得而低徊想像
之也

